


# GUERZ SANTEZ ANNA VENED



*Discan.*

Enor, bennoz da Santez Anna,  
 Meulomp, meulomp ar Vam ar wella !  
*pe* Santez Anna, Mam a garantez,  
 Taolit varnomp eur zell a druez !

## KENTA LODEN

1  
 Canomp a vouez huel  
 Mam goz hon Doue ;  
 Ni oll, e Breiz-Izel,  
 'Zo he bugale.

2  
 Itron Santez Anna,  
 Clevit hor peden ;  
 Ni a zeu da gana  
 Ama 'neur vanden.

3  
 Ama da zaoulina  
 Ebarz ho chapel,  
 Itron Santez Anna,  
 Ni 'zo deut a bell.

4  
 Nijit a denn-askel,  
 Elez ann envou,  
 Ha gant tud Breiz-Izel,  
 Savit ho moueziou.

5  
 Bleuniou euz ar prajou  
 Ha c'hui, laboused,  
 Stered euz ann envou,  
 Lavarit bepred :

6  
 Guechall, tud hor bro geiz,  
 Siouas ! 'oa renet,  
 Dizoue ha difeiz,  
 Gant an Droug-Spered.

7  
 An dizurz, ar pec'hed,  
 Eur buez diroll,  
 Gant an dizlealded  
 'Oa lod cazi oll.

8  
 Mam ar Verc'hez Vari  
 A bedas Jesus :  
 « Va Zalver, emez-hi,  
 « Bezit truezus !

9  
 « Evitho 'peus skuillet  
 « Ho coad precius ;  
 « Ganeoc'h int bet prenet,  
 « Truez, o Jesus. »

10  
 Hogen, en amzer-se,  
 E oa eur c'hristen,  
 Guir zervicher Doue,  
 Fur, ha guella den.

11

Gant feiz ha carantez,  
Gant doujans ive,  
Nicolazic bemdez  
A bede Doue.

12

Eun nozvez, noz eurus,  
Er park, 'creiz an hân,  
Eur c'houlouën lintrus  
A gherz dirazhan.

13

Ag evelse blieniet  
Varlec'h ez a eün,  
Ag e chomm zebezet  
'Kichen ar feunteun.

14

'Kreiz caëra sklerijen,  
'Oa tra burzudus,  
Zavet var eur c'hoabren,  
Eun itrôn skedus.

15

Nicolazic spountet,  
D'ar person neuze,  
E 'z ia da lavaret  
Enkrez he ene :

16

« Ke, pen foll, rambreüs,  
Eme ar beleg ;  
Ha gant comzou faüs :  
« Er mez, côz-teodek. »

17

Pebez den reuzeudic !  
Siouas... gourdrouzet,  
Paour kez Nicolazic !  
Gant an oll goapeet.

18

En he dristidighez,  
E ma confortet ;  
Rac breman ar zantez  
D'hrân en deuz preghet.

19

« Perag e zout nèc'het  
« Nicolazic keiz ?  
« Lak diboan da spered,  
« Chôm stard en da feiz. »

20

« Va zervicher fidel,  
« Den mui na c'houie,  
« Oa aman eur chapel  
« Caret gant Doue.

21

« Me fell d'in adarre  
« Ama bea pedet,  
« Pedet e peb mare,  
« Gant ar Vretoned.

22

« Aman eo red sevel,  
« Bras, huel ha coant,  
« Em enor, eur chapel ;  
« Caout a ri arc'hant. »

23

Mont a reaz da gleuza  
Var lez an dachen,  
Ag euz Santez Anna,  
'Cavas ar skeuden.

24

'Tal an imaj santel,  
El lochen balan,  
'Teue tud Breiz-Izel,  
Stank evel guenan.

25

Er Bocenno 'liez,  
Oll tud Keranna  
A gleve an Elez  
Laouen o cana.

26

Er plas burzudus-se,  
Ken pell oa zavet,  
D'ar vam a garante,  
Eun templ benniget.

27  
Ha piou hell niveri  
An oll miraclou  
Gret bep bloavez ganthi  
'Vit pep ezommou ?

28  
Hon tud coz deuz guellet,  
Gant kùnz ha glac'har,  
An ilizou prennet  
'Nho amzer digar.

29  
Breiziz, nag a enkrez,  
En tan poa devet  
Imaj ho patronez,  
Er gher a Wened !

30  
Coulscoude en Arvor,  
O mam dous ha mad,  
Ho chapel-hu digor  
A chommas dalc'h mad

31  
Mil bennoz da Zoue  
A reas d'ar Frans  
Ar sioulded adarre  
Goude an droulans !

32  
Bemdez ho pobl caret,  
O santez Anna,  
Muioc'h mui zo deuet  
C'hoaz d'ho pizita.

33  
Hag evit dighemer  
Oll ho pugale,  
Ho chapel re zister  
Zo cavet neuze.

34  
Mes c'hui, pinvidien,  
Ro argant hag aour,  
Ha c'hui ho kuenneien  
Tud diaz ha paour.

35  
C'hui, tud euz ar mezou,  
A guennik ivez  
Mein-daill ar vengleunziou,  
Derven ar menez.

36  
An otrou Guillouzo,  
Etal dor pep ty,  
En deus *clasket* er vro  
Digant pep-hini.

37  
Piou ve ar guir Breizad  
Da santez Anna  
Na ro a galon vad  
Eus e beadra ?

38  
Eun iliz zo zavet  
Caër, nerzus ha coant  
Gant mein dentelezet,  
Mabr, aour hag arc'hant.

39  
Eun iliz-veur, huel,  
Burzudus meurbet,  
Dre-oll, e Breiz-Izel,  
He fares neus ket.

40  
Evel eur rouannez  
Var lein an iliz,  
Skeuden hor patronez  
A rên var Breiz !

### EIL LODEN

1  
Santez Anna Vened,  
Bennoz d'hoc'h hano !

O va mam bennighet,  
Diouallit hor bro.

2  
Soudarded Breiz-Izel  
Ken stard en emgan,  
A c'houlen ho skoazel  
Pa vent creiz an tan.

3  
Martolod 've clevet  
Pa dreuz ar mor donn :  
« Santez Anna Vened,  
« Peñit evidonn. »

4  
Pleget var an dachen,  
Labourer douar,  
Evel pep guir gristen  
Bepred a lavar :

5  
O clask eun tam bara  
E harz toul an or,  
Kan... paour santez Anna,  
Te gavo digor.

6  
Dirag Santez Anna,  
Paour ha pinvidic,  
It 'ta, da zaoulina,  
C'hui tud reuzeudic.

7  
D'an dall ro ar guele  
Nerz d'an digalon',  
D'ar bouzar ar c'hleved,  
Peoc'h d'an anaon.

8  
Caout a ra d'ar pec'her  
Distro da Zoue,  
Ha dirag he varner  
Truez d'he ene.

9  
It, tad, mam ha bugel,  
It, tud an Arvor,  
Diwrec'h ho mam zantel  
Deoc'h oll zo digor.

10  
Va mam ! en hor bro geiz,  
Guechall bro ar zent,  
Renevezit ar feiz  
Evel ma voa kent.

11  
Kuzit hor bugale,  
O va mam zantel,  
Keit a ma vo arne  
Dindan ho mantel !

12  
Keit a ma vo bleuniou  
E brük ar menez,  
D'hor mam hor c'halonou  
Zalc'ho carantez

13  
Eun deiz, enn he c'hichen  
Ra vezimp eurus,  
Ra ganimp da viken :  
Bennoz da Jesus !

FIN.

J. SALAUN.

IMPRIMATUR.

E Santez Anna Vened, ann 19 a viz gouere 1884.

Jégouzo, Vikel-braz.